

Unsere Gedichte nehmen Bezug auf das zweite Paar des Bibelzitats:
„Pflanzen hat seine Zeit, und Gepflanztes ausreißen hat seine Zeit“

Fröhbeet

Em Määz knuv der Papp sich
Et Fröhbeet parat.
Setz Schlot un Radiesjer
Janz fing, akkerat.
Hä deit fließich jeeße
Un lo't jeden Daach.
Et waaße sing Plänzjer,
Wann't Sönnche schön laach.

Doch bruch dat Jemös och,
wie mallich wal weiß,
Jenoch fresche Luff, söns
Weed flöck et zo heiß.
Dröm muss mer jot lüfte,
De Rutten erop.
Op Schlot freuen all sich
Un waden allt drop.

Der Papp zor Kuntroll hät
De Jroß enjesatz.
Die hät et verjesse.
Et wor för de Katz.
Wie off och der Papp met
Der Jeeßkann jerannt,
Der Schlot, de Radiesjer,
Et wor all verbrannt.

Ingeborg F. Müller

Der Noßbaum-Schmitz

Em Dörpche – wo, dat mäht nix uus,
do wonnte bal en jedem Huus
ne boore Mann, dä schrevv sich Schmitz.
Wo mer su eng zosammesitz,
me'm selve Name Döör an Döör,
köm sicher leich Verwähßelung vör,
wa'mer sich nit dran kenne dät,
dat mallich en dem Dinge dräht
Beiname, däftig, allbekannt.
Et Namegevve hät om Land
Vun alders her ne deefe Senn
un klingk off lösting bovvedren

Et Dörp woß, wie mer Mann för Mann
de Schmitze ungerscheide kann,
der Schmitze Schäng vum Schmitze Fritz,
dat wor vör Johre su wie jitz.
Wat gov et all för Zoote Schmitz!
Der lange Schmitz, der koote Schmitz,
der Piefe-Schmitz, der Knolle-Schmitz,
der stieve Schmitz, der dolle Schmitz,
der Prumme-Schmitz, der Brelle-Schmitz,
der Koh-Schmitz, der Kapelle-Schmitz,
der Schmitze Gäl, de Schmitze Pürk,
der Schmitze Schäl, der Schmitze Türk,
de Schmitze Nas, der Schmitze Spitz –
dä hatt sich ens ne Hungk gestritz -,
der griese Schmitz, der Möhne-Schmitz,
der fiese Schmitz, der schöne Schmitz –
halt op! Jetz weiß ich keine mih.
De ganze Schmitze-Kumpanie
Drog stell die Name met Humor.

Et wor em Dörpche einer nor,
dä su jet nit verdrage kunnt.
Vör singem Huus ne Noßbaum stund.
Der schönste Baum wicköm em Land.
Dröm wood hä Noßbaum-Schmitz genannt.

Ne Name noh däm staatse Baum
soll schlääch sin? Dat versteiht mer kaum.
Got, wa'mer keine schläächtere kritt!
Doch unsem Schmitz gefeel hä nit.

Su off hä singe Name hoot,
hät hä dä Baum falsch angelort.
Wann Kinder hinger Heck un Britz
us Wellmot reefe „Noßbaum-Schmitz“,
leef hä me'm Knöppel inne noh,
schlog mänchem och der Puckel blo.

Wer Lück om Land kennt, weiß geweiß,
wie schwer he jet zo maachen eß.
Ov mer do knottert, kött ov schängk,
ganz ömesöns, mer brängk un brängk
dä Name su nit us der Mod.
Em Gägendeil, dat deit nit got.
Wat einer weld mäht, weed im grad
us Frack noch immer mih gesaht
vum Größsche wie vum kleine Ditz.
Su ging et och dem Noßbaum-Schmitz.
Dä kräg de Nas op eimol voll,
reef singem Knääch, vör Wot halv doll:
„Dä Name weed jetz avgeschaff!
Flöck, Pitter, hau dä Noßbaum av!“
Gesaht, gedon. Der Baum wor fott.
De Lück han all der Kopp geschott:
„Schad för dä schöne Noßbaum! Wad,
do Klotzkopp wells et han. No grad!“
Un unse Schmitz? Wie heesch hä jitz?
Der **avgehauene** Noßbaum-Schmitz.

Johannes Theodor Kuhlemann